

**INTERNACIONALNI BURČ UNIVERZITET
INTERNATIONAL BURCH UNIVERSITY**



**ETIČKI KODEKS STUDENATA VISOKOŠKOLSKE USTANOVE
INTERNACIONALNI BURČ UNIVERZITET**

**STUDENTS' CODE OF ETHICS OF HIGHER EDUCATION INSTITUTION
INTERNATIONAL BURCH UNIVERSITY**

Sarajevo, maj 2017.

Na osnovu člana 119. Zakona o visokom obrazovanju Kantona Sarajevo („*Službene novine Kantona Sarajevo*“ broj: 42/13 – prečišćeni tekst i 13/15) te člana 21. Statuta visokoškolske ustanove Internacionalni Burč univerzitet – prečišćeni tekst, br.: 01-109-3/17 od 26.04.2017. godine, Senat Internacionalnog Burč univerziteta – International Burch University na svojoj CXL sjednici, održanoj 31.05.2017. godine, donio je

ETIČKI KODEKS STUDENATA VISOKOŠKOLSKE USTANOVE INTERNACIONALNI BURČ UNIVERZITET – INTERNATIONAL BURCH UNIVERAIRTY

I. OPĆE ODREDBE

Član 1.

- (1) Etički kodeks studenata je skup normi ponašanja koje su dužni poštovati svi studenti Internacionalnog Burč univerziteta (u daljem tekstu: Univerzitet).
- (2) Etički kodeks za studente predstavlja primjenu općih normi etičnosti i profesionalnosti na posebnu domenu studentskih prava i obaveza.
- (3) Studenti su dužni poštovati norme etičkog kodeksa nastavnika Univerziteta, te norme etičkog kodeksa studenata Univerziteta.
- (4) Studenti koji povrijede norme iz stava 3 ovog člana bit će podložni disciplinskim sankcijama nadležnih instanci.

Član 2.

- (1) Od studenata Univerziteta očekuje se da se ponašaju kao odgovorni članovi akademske zajednice poštujući zakone i propise, osnovna ljudska prava, integritet i dostojanstvo drugih osoba, akademske slobode, načela ravnopravnosti i pravednosti, te da savjesno i profesionalno ispunjavaju svoje obaveze.
- (2) Prava i obaveze propisane ovim etičkom kodeksom odnose se samo na radnje i ponašanje studenata u prostorijama koje posjeduje i koristi Univerzitet, te na radnje izvan Univerziteta koje su vezane uz predavljanje i zastupanje fakulteta.

II. PRAVA STUDENATA

Član 3.

Univerzitet štiti i poštuje sljedeća prava studenata:

- a) pravo na sudjelovanje u nastavnom procesu;
- b) pravo na slobodno iznošenje i razmjenu mišljenja i uvjerenja;
- c) pravo na sudjelovanje u raspravama;
- d) pravo na naučno istraživanje, objavljivanje i razmjenu rezultata istraživanja u mjeri u kojoj je to u skladu sa Statutom Univerziteta (u daljem tekstu: Statut) zakonima i propisima;
- e) pravo na objektiv i pravedan postupak vrednovanja rada studenata;
- f) pravo na zaštitu od nasilja, prinude i prijetnji primjenom sile;
- g) pravo na zaštitu od diskriminacije i uznemiravanja na temelju religijske, etničke i nacionalne pripadnosti, rase, spola, spolne orijentacije, imovinskog stanja, porodičnog ili bračnog statusa, trudnoće, starosti, invaliditeta, tjelesnog izgleda, političkog opredjeljenja i zdravstvenog stanja;

- h) pravo na učešće u mirnim, nenasilnim, prijavljenim protestnim postupcima ili demonstracijama u mjeri u kojoj oni ne krše prava drugih članova fakultetske zajednice;
- i) pravo na zaštitu od bilo koje vrste ilegalnih i neovlaštenih ispitivanja ili istraživanja;
- j) pravo na zaštitu od traženja ličnih podataka koji nisu na direktan način vezani uz nastavni proces;
- k) pravo na primjenu jednakog i pravednog postupka utvrđivanja utemeljenosti optužbi za povredu propisa Univerziteta;
- l) pravo na izbor i ustanovljavanje predstavničkih, demokratskih organiziranih studentskih organizacija koje su odgovorne akademskoj zajednici studenata;
- m) pravo studentskih organizacija na zastupanje stava koji je donesen primjerenim postupkom odlučivanja unutar akademske zajednice;
- n) pravo na obavještanje i blagovremeno informiranje o pravilima i propisima Univerziteta;
- o) pravo studentskih organizacija na prijem kod ovlaštenih osoba Univerziteta radi iznošenja stavova studenata koje zastupaju;
- p) pravo na evaluaciju rada nastavnika, saradnika i kvalitete nastavnog rada;
- q) pravo slobodnog izbora načina ponašanja sve dok svojim ponašanjem ne krše zakone i pravila utvrđena Statutom Univerziteta;
- r) pravo na upotrebu imovine uz saglasnost Univerziteta, bilo kao pojedinaca ili članova/članica studentskih organizacija, za vannastavne aktivnosti kojima je cilj zadovoljiti akademske i studentske potrebe u mjeri u kojoj nisu u suprotnosti s propisima i pravilima Univerziteta;
- s) pravo zadržavanja nepromijenjenog statusa, prava i privilegija članova/članica akademske zajednice tokom trajanja disciplinskog postupka, osim u slučajevima u kojima predstavljaju prijetnju za sigurnost i dobrobit ostalih članova/članica akademske zajednice te za imovinu Univerziteta.
- t) ostala prava koja su definisana Statutom Univerziteta i relevantnim zakonima.

III. AKADEMSKO NEPOŠTOVANJE

Član 4.

- (1) Akademska nepoštovanje ugrožava kvalitet nastavne i naučne djelatnosti Univerziteta i obezvrjeđuje njegova istinska dostignuća.
- (2) Bilo koja vrsta prevare vezane za postupak prijavljivanja, ispitivanja ili druge vrste provjere znanja predstavlja povredu ovog etičkog kodeksa, što uključuje, a nije ograničeno samo na sljedeće:
 - a) pribavljanje, prenošenje, primanje, upotreba ili namjera upotrebe ispitnih materijala bez dopuštenja ovlaštenih osoba, kao i ispitnih rješenja;
 - b) upotreba ili namjera upotrebe bilješki, podataka, računara ili drugih elektronskih uređaja ili programa za vrijeme ispita ukoliko nije dopuštena;
 - c) lažno predstavljanje i predstavljanje tuđeg rada kao svojeg;
 - d) upotreba već ocijenjenih radova u cilju ponovnog ocjenjivanja na istom ili drugom kolegiju bez odobrenja nastavnika;
 - e) mijenjanje ili namjera prepravljanja ocjene ili rezultata vrednovanja ispita ili izvještaja s drugih provjera znanja;
 - f) namjerno uništavanje akademskog rada ili napora drugih studenata.
- (3) Povredu ovog etičkog kodeksa također predstavlja:
 - a) plagiranje i krivotvorenje radova ili dijelova radova drugih osoba te iznošenje ideja drugih osoba kao vlastitih, bez znanja autora ili navođenja izvora;
 - b) proizvodnja, upotreba, krivotvorenje, printanje, reproduciranje, kopiranje, izmjenjivanje, premještanje ili uništavanje bilo kojeg akademskog materijala, fakultetskog spisa, dokumenta ili identifikacijske isprave bez dopuštenja ovlaštenih osoba;

- c) stvaranje situacija u kojima će drugi studenti biti nepravično zakinuti za akademska dobra ili u kojima student stvara nepoštenu akademsku prednost pred drugim studentima;
- d) uticaj ili pokušaj uticaja na nepristranost vrednovanja nastavnika ili fakultetskih tijela koje provode vrednovanje;
- e) javno zastupanje ili predstavljanje Univerziteta, studentske organizacije (u daljem tekstu: Studentski parlament) ili drugog člana akademske zajednice bez dopuštenja ovlaštene osobe;
- f) javno iznošenje neprovjerenih i/li netačnih podataka o drugim studentima, te o ostalim članovima akademske zajednice;
- g) namjerno ometanje ili prekidanje nastave, istraživanja ili drugih akademskih aktivnosti, bez saglasnosti ovlaštenih osoba;
- h) neovlašteni pristup, krađa ili uništavanje intelektualnog vlasništva;
- i) umnožavanje ili upotreba logotipa ili žiga Univerziteta, logotipa i žiga Studentskog parlamenta bez dopuštenja ovlaštene osobe;
- j) prodaja i upotreba cigareta, opojnih droga i/ili alkohola u prostorima koje Univerzitet posjeduje, koristi ili kontroliše;
- k) namjerno onemogućavanje ulaza, izlaza ili ometanje normalne upotrebe objekata Univerziteta;
- l) ostajanje ili zadržavanje u bilo kojem objektu Univerziteta nakon propisanog vremena;
- m) unošenje oružja, eksplozivnih naprava, opasnih hemikalija u bilo koji objekat koji je pod kontrolom i nadzorom Univerziteta;
- n) namjerno iznošenje netačnih i/ili neprovjerenih informacija s ciljem lažnog uzbunjivanja bilo kojeg člana akademske zajednice;
- o) zloupotreba softverskih sistema ili tehnoloških resursa za nedopustive svrhe;
- p) neodazivanje na pozive vezane za provedbu disciplinskog postupka, te bilo kakvo ometanje provođenja disciplinskog postupka;
- q) namjerno pomaganje, poticanje ili unajmljivanje druge osobe u činjenju neke radnje koja se smatra povredom ovog etičkog kodeksa;
- r) posjedovanje, davanje drugoj osobi, izrada ili učešće u izradi ključa ili drugog sredstva koje omogućava pristup objektima ili imovini Univerziteta bez dopuštenja ovlaštenih osoba.

IV. ETIČKA KOMISIJA

Član 5.

O kršenju odredbi ovoga kodeksa odlučuje Etička Komisija (u daljnjem tekstu: Komisija) koju imenuje rukovodilac organizacione jedinice.

Član 6.

- (1) Komisija se sastoji od predsjednika i četiri člana od kojih je jedan član Komisije predstavnik studenata.
- (2) U radu Komisije ne smije učestvovati nastavnik ili druga osoba kod koje je Kodeks povrijeđen.
- (3) Dekan osigurava uslove za rad Komisije.

Član 7.

O pokretanju postupka odlučuje Komisija na temelju vlastite inicijative ili na inicijativu nastavnika, drugih zaposlenika, studenata ili drugih osoba koje smatraju da su prekršene odredbe ovog kodeksa.

Član 8.

Prostorije Univerziteta nalaze se pod video nadzorom te se snimke povreda prava i obaveza studenata mogu koristiti kao dokaz i osnov za pokretanje disciplinskog postupka.

Član 9.

- (1) U slučaju povreda ovoga kodeksa Komisija obavještava dekana.
- (2) Ako je povredom ovoga kodeksa došlo do povrede zakona, drugog propisa ili općeg akta Univerziteta, dekan, u roku od 15 dana o tome obavještava nadležno tijelo.

V. ZAVRŠNE ODREDBE

Član 10.

- (1) Univerzitet i Studentski parlament imaju obavezu osigurati neophodne uslove kako bi svi studenti bili upoznati sa sadržajem etičkog kodeksa za studente.
- (2) Za sve ostale odredbe koje nisu definirane ovim etičkim kodeksom, primjenjuje se Statut Univerziteta, relevantni zakonski propisi, Pravilnik o disciplinskoj i materijalnoj odgovornosti studenata na Univerzitetu i drugi opći akti Univerziteta.
- (3) Etički kodeks stupa na snagu danom usvajanja i objavom na oglasnoj ploči Univerziteta.

Broj: 01-168-1/17
Sarajevo, 31.05.2017. godine

Predsjedavajući Senata
Prof. dr. Damir Marjanović